

Tgi ha las meglras aczias politicas?

In gieu sin RTR online

DA CLAUDIA CADRUVI / ANR

■ **Dastgan ins giugar cun partidas politicas? Dastgan ins martgadar cun ellas sco cun aczias ad ina bursa – e quai a moda virtuala? RTR online fa quai. Igl è in gieu interessant.** Tgi che visita la pagina RTR online vesa immediat la grafica: travs cotschnas, melnas u verdas inditgeschan la forza da las partidas grischunas. L'emprim pensan ins ch'i sa tractia d'ina prognosa che la SSR/SRG lascha adina far avant votaziuns impur-tantas. Ma sur la grafica stat scrit «RTR – bursa d'elecziuns chantunalas». Sutvi san ins cliccar sin in link e vegn tar ina pagina cun anc dapli graficas. Là daventi cler: i sa tracta d'in gieu.

Investir en la meglra partida

«Mintgin po sa participar», di *Gion Hosang* da RTR online. «Ils giugaders pon cumprar e vender 'aczias' da partidas ed influenzer uschia il curs d'ina partida – exact sco ils acziunaris influenzeschan il curs a la bursa.» Ils giugadurs na cum-prian betg exnum las aczias da la partida preferida, mabain da quella che fa probabel in bun resultat tar l'elecziun dals 23 d'october. Sch'ina partida lantscheschia ina buna campagna, creschia il curs a la bursa.

Il gieu n'è pia betg in voting per demonstrar la simpatia per ina partida. Anzi, ils participants vulan gudagnar a la bursa ed «investeschan» en quella partida ch'è tenor lur manegiar la ferma.

Meglier che retschertgas?

Gia avant quatter onns hajan las paginas d'internet da la SSR/SRG purschì in tal gieu, di Hosang. Lezza giada dentant betg per il Grischun, mabain sin champ naziunal u autras regiuns. Il gieu cun la bursa d'elecziun saja la finala stà pli damanaivel dal resultat real d'elecziun che las prognosas dal barometer d'elecziun. Quai vul dir: Ils instituts che fan grondas retschertgas tar la populaziun n'han betg tutgà uschè precis il resultat da l'elecziun dal 2007 sco il gieu virtual.

Quest onn porscha la SSR l'emprima giada ina bursa aposta per il Grischun. Da preschent èn registrads 111 giuga-



Tgi ha las meglras carta per ir a Berna?

KEYSTONE

durs che sa fatschantan cun la «bursa d'elecziuns chantunala» e speculeschan cun la fermezza da las partidas grischunas. Sin las autras bursas dals portals d'internet da la SSR datti anc dapli participants che s'occupan dal «martgà» naziunal u d'autras regiuns.

Pult, Parolini, Caduff e Nick

E tge dian ils superius da las partidas grischunas dal gieu virtual? Èn els cuntents cun ils resultats che lur partidas cuntanschan en il gieu? «Jau sun atgnamain sceptic e n'hai betg tanta simpatia per bursas d'aczias», di *Jon Pult*, president da la ps. Ma i fetschia sa chapescha plaschair sche la ps saja tenor quest gieu la ferma partida grischuna (guarda tabella). Sche la ps gudogna pli che 20 pertschient da las vuschs, vegnia el segir ad esser cuntent cun las elecziuns.

«Jau lev era gia ma registrar per il gieu», di *Jon Domenic Parolini*, president da la pbd. «Ma fin uss n'hai jau betg gi temp.» L'emprim saja la pbd stada sin ils ultims plazs. En il fratemp haja sia partida cuntanschì il segund plaz. Quai

mussia ch'i dependia adina tgi che sa participeschia ad in tal gieu.

«Las medias ston avair insatge per far attent sin sasez», di *Marcus Caduff*, schef da fracziun da la pcd. El craja che la pcd, pld e pbd vegnian a far tar l'elecziun mintgina radund 18 pertschient da las vuschs. Uschia sajan las procentualas da la «bursa d'elecziun chantunala» atgnamain anc realistas. Ch'ils verd-liberals cuntanschian 9,4 pertschient na crai Caduff dentant betg.

«Igl è ina bun'idea, creativa, cun meds moderns, nua ch'era giuvenns pon sa participar», lauda *Reto Nick*, schef da fracziun da la pld. El speria ch'il gieu chattia bun resun. Ma cun ils 14,6 pertschient – che sia partida ha cuntanschì enfin ier en il gieu – n'è Nick sa chapescha betg cuntent.

«La finamira è da far passa 19 pertschient da las vuschs.» Betg mo en il gieu, mabain sco tar las elecziuns realias il 2007.

Partida grischuna	procentuala da «aczias»	differenza visavi 2007
ps	21,4	-2,3
pbd	18,2	+18,2
pcd	17,1	-3,2
pld	14,6	-4,5
pps	13,2	-21,5
verdliberals	9,4	+9,4
autras	4,3	+2,1

RTR online, Pro:Kons, ils 31 d'avust da mezdi

La ps grischuna gudogna a la bursa

Ier da mezdi steva il curs da la ps grischuna sin il sorisum. En il gieu – ch'ins po observar u far part sin RTR online – aveva la ps ina procentuala d'aczias da 21,4 pertschient. Visavi il resultat da l'elecziun reala dal 2007 fiss quai in minus da 2,3 pertschient.